

Bosna i Hercegovina
FEDERACIJA BOSNE I HERCEGOVINE
AGENCIJA ZA NADZOR OSIGURANJA
FEDERACIJE BOSNE I HERCEGOVINE
SARAJEVO

"Službene novine Federacije BiH", broj 80/06

Na osnovu čl. 8. i 10. Zakona o društvima za osiguranje u privatnom osiguranju («Službene novine Federacije BiH», broj 24/05), člana 9. Zakona o posredovanju u privatnom osiguranju («Službene novine Federacije BiH», broj 22/05) i člana 16. Statuta Agencije za nadzor osiguranja Federacije Bosne i Hercegovine, Stručni savjet Agencije za nadzor osiguranja Federacije Bosne i Hercegovine, donosi

P R A V I L N I K
O BLOKIRANJU IMOVINE I OSIGURANJU OD ODGOVORNOSTI IZ DJELATNOSTI BROKERA U OSIGURANJU

Član 1.

Ovim Pravilnikom reguliše se način blokiranja imovine brokera u osiguranju kao i sve pojedinosti u vezi sa osiguranjem od odgovornosti iz djelatnosti brokera u osiguranju.

Član 2.

Broker u osiguranju je pravno ili fizičko lice koje samostalno obavlja djelatnost, čiji je isključivi zadatak da u ime osiguranika i reosiguranika, radi osiguranja ili reosiguranja rizika, poveže lica koja traže osiguranje ili reosiguranje sa društvima za osiguranje i reosiguranje.

Član 3.

Broker u osiguranju, za obavljanje djelatnosti da bi se registrovao, mora imati dokaz o deponovanim sredstvima u iznosu od 200.000,00 KM ili garanciju banke na navedeni iznos.

Ugovor o namjenski deponovanim sredstvima kao i tekst garancije banke iz stava 1. ovog člana mora biti prihvatljiv Agenciji za nadzor osiguranja Federacije Bosne i Hercegovine (u daljem tekstu: Agencija za nadzor).

Broker u osiguranju obavezan je zaključiti i osiguranje od profesionalne odgovornosti u slučaju greške ili propusta u poslovanju.

Član 4.

Sredstva namjenskog depozita i bankarske garancije namijenjena su za izmirenje obaveza prema ugovaračima osiguranja.

Član 5.

Raskid ugovora o namjenskom depozitu i vraćanje bankarske garancije može se izvršiti samo uz prethodnu saglasnost Agencije za nadzor.

Član 6.

Povlačenje sredstava sa namjenskog depozita i aktiviranje bankarske garancije vrši se na osnovu zahtjeva Agencije za nadzor u slučaju oduzimanja odobrenja za rad ili izvršne sudske odluke kojom je utvrđena odgovornost brokera u osiguranju prema osiguraniku.

Član 7.

Broker u osiguranju zaključuje polisu osiguranja od odgovornosti iz djelatnosti.

Polisa osiguranja od odgovornosti iz djelatnosti pokriva profesionalnu odgovornost brokera u osiguranju koja proizilazi iz grešaka i propusta iz obavljanja djelatnosti.

Polisa osiguranja od odgovornosti iz djelatnosti brokera u osiguranju zaključuje se sa najnižim iznosom pokrivača od 400.000,00 KM.

Član 8.

Ugovor o osiguranju mora biti zaključen sa društvom za osiguranje koje posluje u Federaciji Bosne i Hercegovine.

Period osiguranja ugovora mora biti jednak periodu registracije brokera u osiguranju, uvećan za jedan mjesec.

Član 9.

Broker u osiguranju obavezan je dostaviti dokaz Agenciji za nadzor da je zaključio polisu osiguranja od odgovornosti iz djelatnosti, kao i dokaz o deponovanim sredstvima odnosno garanciji banke.

Član 10.

Ovaj Pravilnik stupa na snagu osmog dana od dana objavljivanja u «Službenim novinama Federacije BiH» .

PREDSJEDNIK STRUČNOG SAVJETA
mr. Zaim Hećo, v.r.

Broj: 1.0.-021-586-11/06
Sarajevo, 28.11.2006.godine